

Pcd e pps vulan dismetter il chasti da maridaglia

Comité grischun cun represchentants da pcd e pps cunter il chasti da maridaglia

■ (mc) En la politica da famiglia èn pcd e pps savens dal medem avis. Las famiglias ston vegnir distgargiadas resp. promovidas dapli, damai ch'ellas èn il coc da nossa societad. Questa coaliziun tematica è sa mussada gia tar l'iniziativa per deliberar ils supplements d'uffants da la taglia ed uss pusè tar l'iniziativa che vul abolir il chasti da maridaglia tar la taglia e tar las ovras socialas. Ier ha il comité grischun che sustegn l'iniziativa cun cusseglier dals chantuns Stefan Engler e deputà Livio Zanetti (tuts dus pcd) e cusseglier naziunal Heinz Brand e Valérie Favre Accola (tuts dus pps) preschentà a las medias lur arguments a favur da l'iniziativa dal pievel «Per la lètg e la famiglia – na als dischavantatgs per pèrs maridads». La finamira da l'iniziativa è da finalmain eliminar ils dischavantatgs da consorts e pèrs registrads tant tar la taglia sco tar las rentas. Gia l'onn 1984 ha il tribunal federal numnadain gi decidì cler e net ch'il chasti da maridaglia cunterfetschia a la Constituziun federala. Capità sin plaun politic è dentant fin qua nagut.

Pertge dovri questa iniziativa?

Cusseglier dals chantuns Stefan Engler (pcd) declera ch'ina iniziativa saja lura necessaria sch'il cussegl federal ed il parlament na sajan betg abels u hajan betg la voluntad d'eliminar in problem reconuschì generalmain sco malgistadad. Quai haja il tribunal federal constatà dadi e repetidamain senza che la politica haja dentant reagì. Tut las partidas – pld e ps inclusiv – concedian che pèrs maridads – e dapi 2007 era partenadis registrads – vegnian discriminads finanziaimain, ellas na sajan dentant betg prontas da finalmain eliminar questa malgistadad, ha punctuà Engler.



Pcd e ps s'engaschan cuminaivlamain per l'iniziativa da la pcd. Da san. Deputà Livio Zanetti (pcd), cusseglier dals chantuns Stefan Engler (pcd), cusseglier naziunal Heinz Brand (pps) e Valérie Favre Accola (pps).

FOTO M. CABALZAR

La malgustia consistia en quai che pèrs maridads vegnian dischavantagiads en cumparegliaziun cun persunas che vivian en concubinad. Mo l'iniziativa saja abla da midar questa malgustia sur la constituziun che sforzia il parlament da daventar activ. Plinavant distgargia l'iniziativa la famiglia ed il stan mez, di Engler. Ella elimineschia la discriminaziun senza ils dischavantatgs da la taxaziun individuala ed effectueschia che era tegnairechadas cun mo ina persuna che gudogna na vegnian betg chastiads.

Dubel dischavantatg

Tenor cusseglier naziunal Heinz Brand (pps) è l'iniziativa in tipic exempel da la «passivdad inacceptabla» da las autoritads federalas. Las stgisas che vegnian fatgas valair per refusar l'iniziativa da la pcd sajan deplazzadas, da natira purmain da politica da partida e violeschian la credibilitad da las instituziuns, di Brand. Entras la progressiun da taglia paja in pèr maridà dapli taglia che sch'el vivess en in concubinad. Anc adina pajan uschia dieschmillis da pèrs en Svizra memia bler taglia mo perquai ch'els èn maridads. «Quai è malgist e

sto perquai finalmain vegnir corrigì» ha ditg Brand. En il medem mument retschaiva in pèr maridà mo 150% da la renta, entant che partenaris da concubinad survegnan duas rentas dublas, pia 200 pertschient. Sco defensur dal federalissem saja el cun persvasiun per l'iniziativa. Ils chantuns hajan numnadain gia corrigì ils dischavantatgs fiscals per pèrs maridads. Brand cumbatta dentant la taxaziun individuala damai che quai saja collià cun blera lavur administrativa. Era la conferenza dals directurs chantunals da finanzas sustegna l'iniziativa. Nunchapavla saja

perquai la posiziun cuntraria da la ministra da finanzas dal Grischun, cussegliera governativa Barbara Janon Steiner (pbd), constateschan Brand ed Engler unisono.

Lètg sco cuminanza economica

«L'iniziativa considerascha la lètg sco cuminanza economica e pretenda perquai che consorts e pèrs registrads vegnian sut-tamess cuminaivlamain a la taglia», constatescha Favre Accola (pps). Mo uschia possian ins evitar in monster da burocracia ch'ina taxaziun individuala chaschunass. I dettia gia en blers chantuns models fiscals per la taxaziun cuminaivla. I vegnia ad esser l'incumbensa dal departament da finanzas da chattar la meglra soluziun. Il dretg fiscal na dastgia en scadin cass betg esser decisiv per la tscherna dal model da famiglia, punctuescha Favre.

Chantuns sustegnan l'iniziativa

Deputà Livio Zanetti (pcd) constatescha che 80 000 pèrs maridads pajan dapli taglia federala che quai ch'els pajassan sco partenaris da concubinad. Da l'iniziativa profiteschian tant pèrs maridads sco pèrs registrads. Pia tut quels che vivian il model da famiglia cun in consort che gudogna, consorts che lavuran tuts dus, lètg cun activitad da gudogn parzial da tuts dus partenaris e cunzunt era pèrs en la vegliadetgna da pensiun. Era quels na vegnessian tractads en l'avegnir tuttina sco pèrs che vivian en concubinad. Cun dus exempels demonstrescha Zanetti che la differenza da la chargia fiscala per pèrs maridads e tals che vivan en concubinad munta a fin 50 pertschient. Tar la renta muntia la differenza tranter pèrs maridadas e tals che vivian en concubinad a radund 14 000 francs per onn. Quest tractament inegal stoppia finalmain vegnir eliminà, punctuescha Zanetti.